



**Meeqqat piitsuussusaannut, ajornartorsiutip annertussusaanut aamma ajornartorsiummut qanoq iliorluni qaangiiniarluni aaqqiissutissaq pillugu apeqquteqaat aallaavigalugu oqallinnissamik siunnersuut.**

( Inatsisartunut Ilaasortaq Asii Chemnitz Narup, Inuit Ataqtigiit)

Qujanaq Inatsisartunut ilaasortamut Asii Chemnitz Narup apeqquteqaat aallaavigalugu oqallinnissamik siunnersuutaanut, oqallisissiamut, tamatsinnut pingaartinneqartumut.

Maani Inatsisartuni isumaqatigiinngittaraluarluta, qularutiginnngilluinnarpara, tamatta meerartatsinnut pitsaanerpaamik sullisserusuttugut. Meeqqat piitsuussusaata piioneerutsinnissaanut oqitsumik akunnaatsumik piviusorsiortumillu iliuusissamik peqaraluarpat, erngerluta aaqqiissagaluartugut qularutiginnngilara.. Ajoraluartumillu oqitsumik akunnaatsumillu iliuusissamik soqangilaq.

Demokraatini isumaqarpugut, siullertut qulakkeertariaqaripput, ilaqutariit meerartallit qaammatit tamaasa amerlanernik imminnut atugassaminnik aningaasaateqarnerulernissaat. Tassani toraagalinnik suliniuteqarnissaq pingaartuuvoq. Nuannaarutigaarput, kaffinut neqinullu akitsuutit peernissaannut Inatsisartunit taperserpeqaratta. Akitsuutimmi taakku peernerisa kingunerissammassuk, ilaqutariit ataasiakkaat aningaasanik atugassaminnik amerlanernik peqalernerat, taamaasillutillu piitsuussusermik misigisimaneq minnerulaartilerlugu.

Taamatutaaq partiit aappaluttut isumaasa allanngortinnissaat, tassa sunaluunniit tamarmik pitsaaningussasoq naligiinnginnerup millisarneratigut. Tamanna ilumuunngilluinnarpoq. Ataasinnguamilluunniit meeraqangilaq ilaqutareeqaranilu, nuannaarnerulertussanik allat nuannaannginnerulerneratigut. Akerlianik naligiinnginneq ukkatarinagu, ukkatarisariaqaraluarparput aningaasaqarnerup pitsaanerulernissaa, minnerusumik pigisaqartut annermik pigisaqalernissaat. Tassa naqqaniittut kivinniartariaqarpagut qulaaniittut ammut maqittarniaannarnagit. Tamanna assersuutigalugu anguneqarsinnaavoq ukiumoortumik akileraarutitigut ilanngaatik qaffanneratigut imaluunniit isertitanit akileraarutitigut akiligassap procentiata apparneratigut.

Tamakku tamarmik massakkoqqinnaaq aaqqiinerinnaassapput. Allatut ajornartumik aamma siunissamut ungasinnerusumut eqqarsartariaqarpugut. Tassanilu sydafrikap præsidenterisimasaa maanna toqoreersoq Nelson Mandela issualarlara:

*”Ilinniarsimaneq sakkuuvoq sakkortunerpaaq, nunarsuup allanngortinnissaanut atorsinnaasat.”*

Oqariartuut sakkortooq maani nunatsinni aamma pingaaruteqarluinnartoq. Naak ukiorpassuit suliniuteqaraluarluta ilinniartitaaneq suliniutigalugu maani Inatsisartuni isumaqatigiilluta, ajoraluartumik sulii amerlavallaat, katataasarpup ilinniagaqangitsoorlutillu. Meeqqat piitsuussusaata akiorniarnernanut suliniummut pingaaruteqartorujussuuvoq, tassami ilinniartitaaneq inummut taassumalu ilaqaataanut qaffasinnermik isertitaqarnermik kinguneqartussaammat. Taamaattumik sulii pingaartillugu amerlanerusut



ilinniagaqalernissaat suliniutigisariaqarparput. Amerlanerit ilinniagaqarnerisigut, meeqqat ikinnerit piitsuussusermi peroriartussapput.

Taamatuttaa aningaasaatitta pitsaanerusumik atornissaannut pingaarnersiuisariaqarpugut. Pingaarnersiunerit kukkusut assersuutigilaa lakka. Maannakkut Naalakkersuisuusut ICC-mut aningaasanik amerlanerit tunniussissallutik aalajangersimapput naak kattuffik NGO-jugaluartoq, privaatiniillu aningaasaateqarfinit aningaasarpassuarnik aningaasaliiffiqarsinnaalluni. Tamannami takoqqammerparput. Naalakkersuisut aamma eqqumiitsuliortunut ataqqinaammik aningaasanik tunisisassalluni aalajangersimapput. Imminut aperisariaqartoqarpassippoq pingaarnersiunerit taamatut ittut eqqortuunersut, meeraqarmat kaallutik innartartunik?

Uagut Demokraatit tungaanniit taama isumaqanngilagut. Isumaqarpugut, tamakku pingaarnersiunerit kukkusuuusut. Aningaasat taakku akerlianik toraagalinnut suliniutinut atugassaagalarput, meeqqat piitsuussusaannut akiuiniarnermut piffissami qanittumi ungasinnerusumullu assersuutigalugu ukiumoortumik ilanngaait appartinnerinut imaluunniit ilinniartitaanerup qaffassarnissaanut suliniuteqarnerunernut.

Tassalu Demokraatit oqallinnermut isummersuutigigallagaat.